

欽定古今圖書集成

方輿彙編職方典



欽定古今圖書集成方輿彙編職方典

第三百九十九卷目錄

歸德府部藝文三

重修歸德府儒學明倫堂記

平寇記

顏魯公祠記

睢州新城記

寧陵縣舊志跋

修夏邑縣城記

明侯恪

朱睦㮮

喬世寧

嚴訥

呂坤

陳陞

歸德府部藝文四 詩

還至梁城作

宋顏延之

行過康王故第苑

梁劉潛

遊梁城

盧思道

木蘭歌

無名氏

過故宋

唐駱賓王

梁園吟

李白

攜妓登梁王樓

前人

鳴臯歌送岑徵君

時梁園三尺雪
在清冷池作

前人

漆園

王維

登商丘

儲光羲

梁園

王昌齡

酬裴鴻臚裴主簿雨後登樓見贈

前人

漆園

裴迪

宋中九首

高適

宋中別司功叔各賦一物得商丘

前人

贈別晉三處士

前人

奉酬睢陽李太守

前人

別韋參軍

前人

同陳留崔司戶早春宴蓬池

前人

封丘作

前人

梁園歌送河南王說判官

岑參

至大梁却寄匡城主人

前人

醉題匡城周少府壁

前人

送鄒判官往陳留

張繼

題清涼寺

楊巨源

送史九赴任寧陵兼呈單父史八時監察五兄

初入臺

劉長卿

守睢陽城

張巡

睢陽城夜聞笛

前人

鐵筆歌

前人

睢陽感懷

韋應物

宋州東望題武陵驛

李嘉祐

過宋州

李端

宋中

耿漳

代宋州將淮上乞師

前人

古今圖書集成

李賀

梁臺古愁

杜牧之

題木蘭廟

秦韜玉

隋隄

釋清江

夕次襄邑

宋杜衍

五老結社詩

王渙

前題

畢世長

前題

朱貫

前題

馮平

遜跡

陳搏

協忠廟

梅堯臣

協忠廟

王安石

睢陽篇題蔡妻張氏

徐積

妙峯亭

秦觀

新亭

前人

協忠廟

元王暉

梁園春二首

元好問

宋宮

明于謙

睢陽歎

李東陽

梁園雪歌二首

李夢陽

梁園歌

前人

黃河

黃元之

協忠廟

曹璉

梁苑歌三首

王廷相

梁園白雪歌

前人

夫子巖

秦時雍

辰過歸德城西二十里溪蓮盛開喜而有賦

梁園

王世貞

朱家相

微子祠

李嵩

秋日登闕伯臺

侯恪

重過開元寺有感

前人

九日重登闕伯臺

前人

孝烈將軍祠

吳伯裔

商均古墓

范良彥

過柘城

吳國倫

古今圖書集成
題公署竹

鄭三俊

贈馬寅旭明府六行

選三

杜齊芳

鳴鳳樓

章煥

凌霄臺

前人

職方典第三百九十九卷

歸德府部藝文三

重修歸德府儒學明倫堂記

明侯恪

崇禎元年今天子神聖御極首誅逆閹臣魏忠賢等
一時日月重朗乾坤更新遂大計天下吏較其賢否
而黜陟之於是郡大夫薛公以治行第一等舉卓異
錫宴賞有差俾還本郡天子憫然念德教之不專不
可以致治乃命所司以久任責成功薛公來屬其俊
士而告之曰天子俾余久守爾土爾土自微子建學

古今圖書集成
以來風俗淳厚教化修明且吾夫子習禮之遺績在焉禮明則分定分定則教行故往者逆祠遍天下而爾郡守禮抗不從也乃者學堂告頽育才無地余恐彝倫之不明教化之不興終爲守土者羞其議所以修之於是鳩工庀材出俸金若干及前守丹陽湯公道衡捐貯贖鍰若干佐之重葺翼日畫棟承雲人工稱奐輪之美庶士興威儀之嘆修旣成薛公屬余記其事余嘆曰卓哉薛公之修茲堂乎先王之治比閭族黨莫不有學皆所以明人倫教綱常也人倫旣明

綱常無斁故其成也道德同宗本末相應上有淳厚之求而下無越軼之行未始有戾焉往者逆璫擅政濁亂天常於是有五拜以爲容九千以爲頌者而君臣之倫廢於是有稱男以獻媚作孫以取悅者而父子之倫乖於是有以臣妾爲蹇修議鸞鷲於丹穴者而夫婦之倫傷於是有結逆孽爲棠棣依奧援如鶴鴿者而兄弟之倫薄於是有見利而援肺肝如平生遇害而下井石相排擠者而朋友之倫壞此其人皆素稱俊士自鄉而貢之王家者豈其不明於道耶上

古今圖書集成
之人無所以提醒其心而勢利相搏憂患相乘故綱常之念頓輕漸漸滅以幾於盡耳大夫慨然於此而重修此堂以明人倫明於上小民親於下豈獨士無越思雖比屋可封也昔唐安史之亂張巡許遠守睢陽爲江淮保障迄使郭李諸將得一意北方以成至德之功抑寧師武臣力足相抗哉無亦惟是君臣大義固結者素故數萬人雖死不渝耳然則此堂之修雖與此倫並不朽可也公諱玉衡原名三台字緯符別號高塵己未會魁浙之定海人

平寇記

朱睦㮮

癸丑之春柘寇師尚詔王邦用袁兇聚頑時出剽竊遠邇騷動守土者不欲遽加以兵乃使使諭以順逆二寇佯若悔禍而實爲謀愈急也七月庚午遂襲歸德明日再陷鹿邑柘城屠燒太康鄆潁犯扶溝許昌聲振京師越七日大中丞衡水祇公來承明詔來自畿內乃會侍御霍公冀暨左使鄒公守愚臬長趙君正學都閩尚君允紹詰戎兵屯芻粟察奸宄羽檄四馳事無巨細悉惟公裁已而諸衛所兵畢至公乃誓

古今圖書集成
於衆曰茲土殘賊式興誕遭毒痛今茲去殘其可以
虐爾千夫長百夫長慎乃部兵毋攘我民資毋擄我
妻孥其有攘於民資擄於妻孥國有常刑毋敢爾宥
又諭兩河之民曰毋憚寇勢從其殺掠其有陷而歸
者俾寧而家乃謂憲副曹君邦輔曰其司紀功兼總
戎事適嚴賞罰以鼓士氣其務在殄滅謂少叅俞君
維屏黃君洪毗曰古之給餉論功爲最若顓錢穀出
納惟時毋飢我師謂僉憲章君煥曰乃與都指揮僉
事尚君允紹以睢陳宣武河南兵五千有奇爲中軍

其彰而威以遏亂略謂僉憲李君豸曰乃與都指揮
僉事李君塘以彰德兵三千有奇爲左軍其茂植乃
猷以殲醜虜謂憲副焦君璉曰乃與指揮袁燦以南
陽信陽汝寧兵二千有奇爲右軍其攄乃誠以襄厥
事於是諸軍肅肅而徂公乃自率諸衛所勁卒千有
五百人以督其後又謂督學憲副徐君霈曰子惟遂
於文謨必閑武略其同余往以撫我師謂都指揮僉
事胡君永錫曰而惟前導以飭而師以耀而武八月
辛酉諸道兵合於襄城賊負險而陣我兵分圍久之

古今圖書集成
稍有却者曹君怒乃戮二人殉於軍中復麾戈而往
以身先之諸士卒感勵奮勇一鼓遂捷其夜邦用就
擒尚詔引餘寇遁去公乃益允紹塘兵千有七百人
乘勝追躡又令憲副謝君佑守鈞陽僉憲李君燧守
覃懷都指揮僉事王君錫戍沈丘指揮夏時戍鹿邑
唐希周戍淮口張希夷戍中都又檄僉憲王君之誥
朱君舜民守備謝君琚協勦之曰今渠魁所遁惟而
所分地其嚴而守以奏乃功九月丙午師次五河監
察霍公責戰益急時尚詔列營水次曹君乃率允紹

攻其南李君率塘攻其東北章君率希周攻其西於
是俞君黃君饋餉不絕屢戰屢捷斬俘前後凡千五
百有奇焚賊舟二十六艘溺者無算中土遂平公獻
捷闕下褒其功賜以金幣仍進俸一級命既下藩臬
長貳諸君謂公奇勳偉績不可泯泯請余記之以告
來者且以爲公賀睦樗固謝不獲乃序其事系之以
詩曰明明皇祖奄有萬方三綱聿舉九法畢張化澤
汪濊敷於遐荒百八十禩維熙維康蠢茲妖孽敢恣
猖狂淵藪逋逃縱其四掠壞我室廬陷我城郭焚炙

古今圖書集成
剝戮式罹慘虐鄢頴太康原野蕭索震驚畿輔撼搖
濠亳顯顯中丞來監於茲峨冠豸服躬視王師謀而
泉默斷乃雷施哀集庶士如熊如羆誓以必尅靡貳
靡疑一遇襄城再鼓南甸干旄蔽霄戈矛掣電虎旅
桓桓直擊夾戰元兇旣殲脅從奔竄渙若霧消解如
冰泮羣宄肅清捲甲戢兵中丞稽首陳於大廷匪臣
之爲實帝之明白茲而往疆場謐寧女供於織男樂
於耕天子嘉之載蕃寵錫榮冠中臺聲被四域儷美
康侯比隆召伯秩秩大猷暉暉令德末翊我明百僚

是則

顏魯公祠記

喬世寧

顏魯公守平原功大故祠祀平原當時義烈終蔡州
也乃蔡又祠祀焉而瑯琊祠則又以文獻故里也歸
德舊無魯公祠歸德祠則建自監察御史王公楠君
子曰禮有以義起者也始王公視事歸德也問郡中
故實郡唐之宋州地有八關齋會報德記石幢云記
蓋顏魯公撰書在故開元廢寺中自會昌時詔毀而
是記也以時禁嚴乃亦毀其半以應詔使而後刺史

古今圖書集成
崔倬者復訪其摹本補刻焉碑有善有不善故今有
顏崔之辨云監察公既閱武歸過廢寺下觀焉而叅
政喬世寧僉事賈君樞郭君惟清都指揮韓君璽從
之見所謂石幢者柱形八面頂如覆釜顧材製特異
而魯公又詞翰並佳斯亦可謂郡中三絕矣已乃讀
其記則宋州刺史徐向率屬吏父老爲河南節度使
田神功建也神功救李岑解宋州之圍此其恩德宋
州者甚大故方其寢疾也而宋州將吏爲作八關齋
會云公乃又顧嘆曰八關者乃佛氏戒規也而飯僧

懺悔事不雅馴不足傳於後世學士家何以稱焉彼
獨重魯公書也嗟乎魯公以風節高世乃後世徒以
其有六書之遺意豈所謂掇華棄實者也宜以廢寺
爲魯公祠以表風節且令郡中有以知魯公也乃遂
檄郡守南君逢吉將事而命世寧爲記焉世寧徘徊
石幢下而愴然悲焉曰斯非睢陽故地邪往祿山之
叛也監城守義者惟平原與睢陽耳當其時北招河
朔南蔽江淮令唐不遂亡者獨以平原睢陽故也今
睢陽人論張許事無不憤惋泣下者彼獨不並念魯

古今圖書集成
公邪故曰禮有以義起者也乃世寧又覽魯公傳見
田神功者蓋魯公始招起焉是神功宋州之澤皆魯
公所遺也而郡祀獨闕然湮滅不報何哉又見其遣
使靈武謁帝鳳翔又獨以忠諒經略河北此固以身
殉天下者也而希烈之難成仁取義千載高焉統之
功亞李郭節並張許所謂社稷臣者非邪卽靈武鳳
翔與河北諸郡皆可以忠貞報祀寧歸德也顧歸德
人獨愛護石幢舊覆以亭亭北新作堂三楹以僧徒
守之蓋稍存八關齋故事耳會將造佛像其中而監

察公至卽改設魯公主令春秋祀焉乃議其典則視
諸張許而題其堂曰顏魯公祠蓋帑無費金民不知
役而表忠顯義施於後世固激揚之風也今而後郡
中知魯公矣公嘗爲監察御史雪河隴冤獄已又使
河東以風裁著而王公楠以御史巡察其嘉尚若此
此其中蓋有合也

睢州新城記

嚴訥

城於睢州之南自御史中丞華陽章公始也睢舊城
以河數溢汚矣南有高阜延袤若干里徙業者萬有

古今圖書集成
餘家公駐節其境思有以保障之因士民之合辭以請而樂自輸其貲也乃詢乃諏乃相乃營乃卽南郭故址崇其卑厚其薄周聚廬之攸止而斥築焉其長十有二里其高二丈有五尺其圍之步積而數之三千八百有奇櫓雉相望屹立蜿蜒蓋經始於嘉靖戊午之仲秋迄明年己未季春告成而睢人於是乎究安矣夫設險以守尚矣往志弗備著卽如今江南大邑往往弗城宰相顧文康崑山人也以言於朝請城崑山初城時有識者多迂之未書德焉居無幾何倭

人跳梁而無城之邑若松之上海附城而叢聚若蘇閩門之郭其處不知凡幾而悉爲所魚肉殆盡崑山被攻尤甚數且久勢孔棘矣獨賴城而保崑山之人至是始知文康公有大庇於我率貌公家祠之頃又請於朝命有司特俎豆之其他因驚而城若我常熟亦不知其凡幾雖成於倥偬間而百萬之命亦得免於糜爛然徵求民於荆棘之後勢必滋憊嚮使無事時率如文康公議預備之則力旣完而費又有經豈不爲計之得哉河南多椎埋剽攻之徒如頃師尚詔

古今圖書集成
最寇耳所過郡邑鮮不被蠱螫者其於城守尤要也
韓文公謂王公大夫之不爲備乃以爲不足爲今郊
關有壘當無以爲不足爲者矣然而不爲備者有三
不肯爲不能爲不敢爲歲月其資傳舍其署轉徙其
心一展采而動淹計必拙於自爲如此而樂任其事
者幾何人乎卽任之矣規畫之方措置之略不必皆
副乎其心也法網今號密矣自非素所樹立矚然不
淄一涉利途遠吏議之不暇孰敢有輒興一邑便宜
於民而自取媒蘖者乃章公以天下心爲心所在經

濟而練識敏力有餘乎其用之其砥礪風概塵視干
駟卽叢之貨財而不一動乎其心蓋自筮仕以來人
皆信之而光祿均節默用姬公九式尤縉紳所共推
服者自保無秋毫私而挺然以身任焉防姦回於未
萌免民難於無形此與文康公之蚤見何異况夫文
康公功施父母之邦而章公又有不啻焉者乎楚令
尹蔦艾獵城沂春秋志而美之章公是役也以工徒
則徵乎師輿以陶甃則爨乎官柳以版築則畚乎圯
垣至於用財則嚴所綱維明其出納於人公不費財

私不勞民爲力省而成功鉅焉跡其慮事而成不愆乎素卽謂今之叔敖也豈過耶睢人欲世世俎豆公而托予述其事傳之無窮其情誠不容已而其意誠宜也章公我蘇人名煥號陽華戊戌進士今方擢御史大夫督漕於淮章公博綜墳籍動則古昔其肯爲能爲敢爲要有所本其勳猷不可勝道而斯城直其一云

寧陵縣舊志跋

呂坤

亙古今惟真是真非不可磨滅僞則難久孔子曰文

勝質則史蓋傷史氏之失真也故自不闕文以來文直事核不溢美隱惡者幾人嘻亦艱矣哉夫史載事之書也載事者如繪象深目仰鼻不失故態若醜鍾離春而西施之則非無鹽人矣寧陵志審史也審之邑鄰審者之所知也其人其風物其山川形勝其古今封域沿革盛衰美惡不可飾也飾則僞爾其誰信不信則不可以徵且傳又並其可徵可傳者疑之其誰辨此史氏之所慎也丙寅冬熊司寇可山公恥是邑之無聞也嘆曰茲非春秋所謂沙隨大棘也與今

古今圖書集成
不志百世後不知有所謂寧陵者卽無問諸遠人迺
今百年前事生寧陵者能自知耶明日闢館延學士
大夫志之僕濫與焉且曰呂子方壯年當先是役遂
以操筆之任來命固辭不許讓於三博士及宿儒諸
君子不許乃相與戒曰茲重典也榮辱人莫大於是
非是非榮辱人莫大於遠且久惟茲典信天下後世
唯茲典貴真毋藉是非之權以市恩怨毋苟進退人
毋復是毋慄慄畏人言以詘公義旣矢志於南川王
祠幾兩月而告就蓋探幽蹟撥散逸閱昔典撫新聞

黜所有進所無裁冗補廢諸君子實夙夜勞而熊公
定國是僕無似竊取義焉嗟夫昔人纂述動以一歲
或二二三歲計茲志也簡率甚矣且僕識謏陋而學蕪
質下而不工於文姑爲後君子作朴耳直書事實據
之古今聞見褒貶公之國人尚無愧於所謂真者與
至於關一邑利害則多躁遽之言論治教風俗人物
賢否得失則傷渾厚之體盛德雅量人必將斥且笑
之僕非不夙夜是慎第所謂呼痛號饑各鳴其情耳
采風者苟辱一省焉則是邑也或稍賴其萬一助若

古今圖書集成
夫原我罪我以為真以為偽則非僕所敢知亦非僕所敢恤也

修夏邑縣城記

陳陞

庸人之悞天下也謂夫事未至而狂焉不為之圖及其猝然而起張皇四顧而卒無救於緩急之數舉而諉之曰天嗟夫此古今之通患也夫惟賢者有先事之識惟賢而才者能不窘於及時之應為民父母使民緩急有可恃故足述耳夏邑古下縣也其城郭肇自禹蹟興廢不可考百年以來頽垣敗竇不可以限

旋修旋廢并其舊址而夷之丙辰二月邑侯霑化徐公始以土工補築頗為堅好然女牆之磚無復存者乃復條議申請於歲額外加四百金有奇計數年城可磚也當事者允其請而徐行矣加派之金竟成積逋歲在壬戌為天啓二年滕寇猝起大河南北魚沸鳥駭攜家而竄者相屬於道五月間驚我侯馬公以六月初旬受事周覽城郭下令撫輯曰城守經也竄將焉往於是嚴保甲按尺籍多方設處畚鍤雲集夷者峻之猿猱不得升穿者實之狐狸不得穴睥睨如

古今圖書集成
鱗壯扉如圭不彌月而百雉屹如城成而人有固志
焉居者安堵徙者來歸生我護我孔邇之頌萬口交
騰夏人於侯蓋有不能忘者焉鄒鄆已陷道里多梗
侯兼程而來急我民之難若其家恤一也不爲繭絲
而爲保障率勵士民務先金湯毅然不可奪之氣有
識有力二也下車數日未有撫循之素而信能任人
令如流水程期迫而課效捷三也昔徐侯彌月而土
功畢侯彌月而磚功畢徐侯之舉事在化行期月之
後而侯之舉事也在猝忽俄頃之間而又當外驚內

患人情駭懼之時其爲力也倍難矣噫非所稱賢而
才其孰能與於此乎徐侯不狃於無事之前侯不窘
於及時之應皆生我夏人者也使後人而復狃焉不
爲之圖高者日以卑完者日以毀將必有猝然而起
張皇四顧而無救於緩急之事可不慮乎諺有之瘡
愈而忘其痛後之君子其尚有感於斯文熒熒夏人
庶永賴焉侯諱希周字齊莊別號抱元直隸雄縣人

歸德府部藝文四

詩

還至梁城作

宋顏延之

渺然軌路長
 憔悴征戍勤
 昔邁先祖師
 今來後歸軍
 振策睠東路
 傾側不及羣
 息徒顧將夕
 極望梁陳分
 故國多喬木
 空城凝寒雲
 丘隴填郭郭
 銘誌滅無文
 木石扃幽闥
 黍苗延高墳
 惟彼雍門子
 吁嗟孟嘗君
 愚賤同湮滅
 尊貴誰獨聞
 曷為久遊客
 憂念坐自殷

行過康王故第苑

梁劉潛

入梁逢故苑
 度薛見餘宮
 尚識招賢閣
 猶懷愛土風

古今圖書集成
靈光一超遠衡館亦蒙龍洞門餘舊色甘棠留故叢
送禽悲不去過客慕難窮池竹徒如在林堂暖已空
遠橋隔樹出迴澗隱崖通芳流小山桂塵起大王風
具物咸如此是地感予衷空想陵前劍徒悲壠上童

遊梁城

盧思道

揚鑣歷汴浦迴扈入梁墟漢藩文雅地清塵暖有餘
賓遊多任俠臺苑盛簪裾歎息徐公劍悲涼鄒子書
亭臯落照盡原野沍寒初鳥散空城久煙消古樹疎
東越嚴子陵西蜀馬相如修名竊所慕長謠獨課虛

木蘭歌

無名氏

唧唧復唧唧木蘭當戶織不聞機杼聲惟聞女歎息
問女何所思問女何所憶女亦無所思女亦無所憶
昨夜見軍貼可汗大點兵軍書十二卷卷卷有爺名
阿爺無大兒木蘭無長兄願爲市鞍馬從此替爺征
東市買駿馬西市買鞍韉南市買轡頭北市買長鞭
朝辭爺娘去暮宿黃河邊不聞爺娘喚女聲但聞黃
河流水鳴濺濺旦辭黃河去暮宿黑山頭不聞爺娘
喚女聲但聞燕山鐵馬鳴啾啾萬里赴戎機關山度

古今圖書集成
若飛朔氣傳金柝寒光射鐵衣將軍百戰死壯士十
年歸歸來見天子天子坐明堂策勳十二轉賞賜百
千強可汗問所欲木蘭不用尚書郎願馳千里足送
兒還故鄉爺娘聞女來出郭相扶將阿妹聞姊來當
戶理紅妝小弟聞姊來磨刀霍霍向豬羊開我東閣
門坐我西間牀脫我戰時袍著我舊衣裳當窻理雲
鬢對鏡貼花黃出門看火伴火伴皆驚惶相隨十二
年不知木蘭是女郎雄兔脚撲朔雌兔眼迷離兩兔
傍地走焉能辨我是雄雌

過故宋

唐駱賓王

舊國千年盡荒城四望通雲浮非隱帝日舉類游童
綺琴朝化洽祥石夜論空馬去遙奔鄭蛇分近帶豐
池文斂束水竹影漏寒叢園兔承行月川禽避斷風
故宋誠難定從梁事未工唯當過周客獨愧吳臺空

梁園吟

李白

我浮黃雲去京闕挂席欲進波連山天長水闊厭遠
涉訪古始及平臺間平臺爲客憂思多對酒遂作梁
園歌却憶蓬池阮公詠因吟淶水揚洪波洪波浩蕩

古今圖書集成
迷舊國路遠西歸安可得人生達命豈暇愁且飲美酒登高樓平頭奴子搖大扇五月不熱疑清秋玉盤楊梅爲君設吳鹽如花皓如雪持鹽把酒但飲之莫學夷齊事高潔昔人豪貴信陵君今人耕種信陵墳荒城虛照碧山月古木盡入蒼梧雲梁王宮闕今安在枚馬先歸不相待舞影歌聲散綠池空餘汴水流東海沈吟此事淚滿衣黃金買醉未能歸連呼五白行六博分曹賭酒酣馳輝歌且謠意方遠東山高臥時起來欲濟蒼生未應晚

攜妓登梁王樓

前人

碧草已滿地柳與梅爭春謝公自有東山妓金屏笑坐如花人今日非昨日明日還復來白髮對綠酒強歌心已摧君不見梁王池上月昔照梁王樽酒中梁王已去明月在黃鸝愁醉啼春風分明感激眼前事莫惜醉臥桃園東

鳴臯歌送岑徵君

時梁園三尺雪在清泠池作

前人

若有人兮思鳴臯阻積雪兮心煩勞洪河凌競不可以徑渡冰龍鱗兮難容舸邈仙山之峻極兮聞天籟

古今圖書集成
之嘈嘈霜崖縞皓以合沓兮若長風扇海湧滄溟之
波濤元猿綠罷舔結峯岌危柯振石駭膽慄魄羣呼
而相號峯崢嶸以路絕挂星辰於巖壑送君之歸兮
動鳴臯之新作交鼓吹兮彈絲觴清冷之池閣君不
行兮何待若反顧之黃鶴掃梁園之羣英振大雅于
東洛巾征軒兮歷阻折尋幽居兮越巘嶸盤白石兮
坐素月琴松風兮寂萬壑望不見兮心氛氳蘿冥冥
兮霰紛紛水橫洞以下淥波小聲而上聞虎嘯谷而
生風龍藏溪而吐雲寡鶴清唳饑謁嘖呻魂獨處此

幽默兮愀空山而愁人鷄聚族以爭食鳳孤飛而無
鄰蠓蜒嘲龍魚目混珠嫫母衣錦西施負薪若使巢
由桎梏於軒冕兮亦奚異乎夔龍蹙蹙於風塵哭何
苦而救楚笑何誇而却秦吾誠不能學二子沽名矯
節以耀世兮固將棄天地而遺身白鷗兮飛來長與
君兮相親

漆園

王維

古人非傲吏自闕經世務偶寄一微官婆娑數枝樹
登商丘

儲光羲

古今圖書集成
河水日夜流客心多殷憂維艸歷宋國結纜登商丘
漢皇封子弟周室命諸侯遙遙世祀遠傷古復兼秋
鳴鴻念極浦征旅慕前儔太息梁王苑時非枚馬遊
梁園
王昌齡
梁園秋竹古時煙城外風悲欲暮天萬乘旌旗何處
在平臺賓客有誰憐

酬裴鴻臚裴主簿雨後登樓見贈
前人

暮霞照新晴雲歸猶相逐有懷晨昏暇想見登眺日
問禮侍彤檐題詩訪茅屋高樓多古今陳事滿陵谷

地久微子封臺餘孝王築徘徊顧霄漢豁達俯川陸
遠水對孤城長天向喬木公門何清靜列戟森已肅
不嘆攜手稀常思著鞭速終當拂羽翰輕舉隨鴻鵠

漆園

裴迪

好閑早成性果此諧夙諾今日漆園游還同莊叟樂

宋中九首

高適

梁王昔全盛賓客復多才悠悠一千年陳迹惟高臺
寂寞向秋草悲風千里來

朝臨孟諸上忽見芒碭間赤帝終已矣白雲長不還

時清更何有禾黍徧空山
景公德何廣臨變莫能欺三請皆不忍妖星終自移
君心本如此天道豈無知
梁園白日暮梁山秋草時君王不可見修竹令人悲
九月桑葉盡寒風鳴樹枝
登高臨舊國懷古對窮秋落日孤鴈度寒城砧杵愁
昔賢不復有行矣莫淹留
出門望終古獨立悲且歌憶昔魯仲尼棲棲此經過
衆人不可向伐樹將如何

逍遙漆園吏冥沒不知年世事浮雲外閑居大道邊
古來同一馬今我獨忘筌
五霸遞征伐宋人無戰功解圍幸奇說易子傷吾衷
唯見盧門外蕭條多轉蓬
闕伯去已久高丘臨道傍人皆有兄弟爾獨爲參商
終古猶如此而今安可量

宋中別司功叔各賦一物得商丘 前人

商丘試一望隱隱帶秋天地與星辰在城將大路遷
干戈悲昔事墟落對窮年卽此傷離緒淒淒賦酒筵

古今圖書集成
贈別晉三處士

前人

有人家住清河源渡河問我遊梁園手持道經註已
畢心知內篇口不言盧門十年見秋草此心惆悵誰
能道知己從來不易得慕君爲人與君好別時九月
桑葉疎出門千里無行車愛君且欲君先達今上求
賢早上書

奉酬睢陽李太守

前人

公侯稱王佐朝經允帝求本枝疆我李盤石冠諸劉
禮樂光輝盛山河氣象幽系高周柱史名重晉陽秋

華省膺推擇青雲寵宴遊握蘭多具美前席有嘉謀
賦得黃金賜皆言白璧酬著鞭驅駟馬操刃解全牛
出鎮兼方伯承家復列侯朝瞻孔北海時用杜荊州
廣固纔登陟毘陵忽阻修三台冀入夢四嶽尚分憂
郡邑連京口山川望石頭海門當建節江路引鳴騶
俗見中興理人逢至道休先移白額橫更息赭衣偷
梁國歌來晚徐方怨不留豈伊齊政術將以變澆浮
訟簡知能吏刑寬察要囚坐堂風偃草行縣雨隨輶
地是蒙莊宅城遺闕伯丘孝王餘井徑微子故田疇

古今圖書集成
冬至招搖轉天寒蟬竦收猿岩飛雨雪菟苑落梧楸
列戟霜侵戶褰帷月在鉤好賢當解榻乘興每登樓
逸足橫千里高談注九流詩題青玉案衣贈黑貂裘
窮巷軒車靜閑齋耳目愁未能方管樂翻欲慕巢由
講德良難敵觀風豈易儔寸心仍有適江海一扁舟

別韋參軍

前人

二十解書劍西遊長安城舉頭望君門屈指取公卿
國風冲融邁三五朝廷歡樂彌寰宇白璧皆言賜近
臣布衣不得干明主歸來洛陽無負郭東過梁宋非

吾土兔苑爲農歲不登雁池垂釣心長苦世人遇我
同衆人唯君於我最相親且喜百年有交態未嘗一
日辭家貧彈棋擊筑白日晚縱酒高歌楊柳春歡娛
未盡分散去使我惆悵驚心神丈夫不作兒女別臨
岐涕淚沾衣巾

同陳留崔司戶早春宴蓬池

前人

同官載酒出郊圻晴日東馳雁北飛隔岸春雲邀翰
墨傍簷垂柳報芳菲池邊轉覺虛無盡臺上偏宜酌
酌歸州縣徒勞那可度後時連騎莫相違

古今圖書集成
封丘作

前人

我本漁樵孟諸野一生自是悠悠者乍可狂歌草澤
中寧堪作吏風塵下祇言小邑無所爲公門百事皆
有期拜迎官長心欲碎鞭打黎庶令人悲歸來向家
問妻子舉家盡笑今如此生事應須南畝田世情付
與東流水夢想舊山安在哉爲銜君命且遲迴乃知
梅福徒爲爾轉憶陶潛歸去來

梁園歌送河南王說判官

岑參

君不見梁孝王修竹園頽牆隱麟勢仍存嬌娥曼臉

成草蔓羅帷珠簾空竹根大梁一旦人代改秋月春
風不相待池中幾度鴈新來洲上千年鶴應在梁園
二月梨花飛却是梁王雪下時當時置酒延枚叟肯
料平臺狐兔走萬事翻覆如浮雲昔人空在今人口
單父古來稱宓生祇今爲政有吾兄輪軒若過梁園
道應傍琴臺聞政聲

至大梁却寄匡城主人

前人

一從棄魚釣十載干明王無由謁天階却欲歸滄浪
仲秋至東郡遂見天雨霜昨日夢故山蕙草色已黃

古今圖書集成
平明辭鐵丘薄暮遊大梁仲秋蕭條景拔刺飛鵝鶴
四郊陰氣閉萬里無晶光長風吹白茅野火燒枯桑
故人南燕吏籍籍名更香聊以玉壺贈置之君子堂
醉題匡城周少府壁
前人

婦姑城南風雨秋婦姑城中人獨愁愁雲遮却望鄉
處數日不上西南樓故人薄暮公事閑玉壺美酒瓊
珀殷潁陽秋草今黃盡醉臥君家猶未還

送鄒判官往陳留

張繼

齊宋傷心地頻年此用兵女停襄邑杼農廢汶陽耕

國使乘輅去諸侯擁節迎深仁荷君子薄賦卹黎氓
火燎原猶熱波搖海未平應將否泰理一問魯諸生

題清涼寺

楊巨源

憑檻霏微松樹煙陶潛曾用道林錢一聲寒磬空堂
曉花雨知從第幾天

送史九赴任寧陵兼呈單父史八時監察五兄
初入臺
劉長卿

趨府弟聯兄看君此去榮春隨千里道河帶萬家城
繡服棠花映青袍草色迎梁園修竹在持贈結交情

古今圖書集成
守睢陽城

張巡

接戰春來苦孤城日漸危合圍俾月暈分守効魚麗
屢厭黃塵起時將白羽麾裏瘡猶出戰飲血更登陴
忠信應難敵堅貞諒不移無人報天子心計欲何施

睢陽城夜聞笛

前人

峒嶢試一臨寇騎附城陰不辨風塵色安知天地心
營開邊月近戰苦陣雲深旦夕更樓上遙聞橫笛音

鐵筆歌

前人

皇天生我兮男子君王用我兮熊羆力拔山兮勢雄

氣貫日兮虹霓月正明兮磨鎗礪劍星未落兮擊鼓
掀旗擣賊室兮焚寨齧賊肉兮充饑食馬草兮計盡
殺妻妾兮心悲爲厲鬼兮身被鐵甲爲明神兮手執
金鎚亦莫指我爲張毅亦莫指我爲張飛我乃唐之
張巡與許遠兮同時在東嶽兮押案都統使兮陰司
事蓬萊兮殿直任艷都兮獄推景祐眞君兮陽間封
爵忠烈大夫兮天上官資漫濡毫而爲翰俾世人而
皆知

睢陽感懷

韋應物

豹虎犯天綱昇平無內備長驅陰山卒路踐三河地
張侯本忠烈濟世有深智堅壁梁宋間遠籌吳楚利
窮年方絕輸鄰援皆攜貳使者哭其庭救兵終不至
重圍雖可越藩翰諒難棄饑喉待危巢懸命終路墜
甘從鋒刃斃莫奪堅貞志宿將降賊庭儒生獨全義
空城惟白骨同堆無賤貴哀哉豈獨今千載當歔歔

宋州東望題武陵驛

李嘉祐

梁宋人稀鳥自啼登艫一望倍含悽白骨半隨河水
去黃雲猶傍郡城低平陂戰地花空落舊苑春田草
未齊明主頻移虎符守幾時行縣向黔黎

過宋州

李端

睢陽陷賊日外絕救兵來世亂忠臣死時清明主哀
荒郊春草徧故壘野花開欲爲將軍哭東流水不回
宋中
耿漳

日暮黃雲合年深白骨稀舊村喬木在秋草遠人歸
廢井莓苔厚荒田路徑微唯餘近山色相對似依依
代宋州將淮上乞師
前人

唇齒幸相依危亡故遠歸身輕百戰出家在數重圍

古今圖書集成
上將堅深壘殘兵鬪落暉常聞鐵劍利早晚借餘威

梁臺古愁

李賀

梁王臺沼空中立天河之水夜飛入臺前鬪玉作蛟
龍綠粉掃天愁露濕撞鐘飲酒行射天金虎蹙裘噴
血斑朝朝暮暮愁海翻長繩繫日樂當年芙蓉凝紅
得秋色蘭臉別春啼脉脉蘆洲客雁報春來寥落野
篁秋漫白

題木蘭廟

杜牧之

彎弓征戰作男兒夢裏曾經與畫眉幾度思歸還把

酒拂雲堆上祝明妃

隋隄

秦韜玉

種柳開河爲勝遊隄前常使路人愁陰埋野色萬條
思翠束寒聲千里秋西日至今悲兔苑東坡終不返
龍舟遠山應見繁華事不語青青對水流

夕次襄邑

釋清江

何處成吾道經年遠路中客心猶向北河水自歸東
古戍鳴寒角疎林振夕風輕舟惟載月那與故人同

五老結社詩

宋杜衍

古今圖書集成
五老四百有餘歲俱稱分曹與掛冠天地至仁難補
報林泉休致許盤桓花朝月夕隨時樂雪鬢霜髯滿
坐寒若以睢陽爲故事何妨列向畫圖看

前題

王渙

分曹歸政養耆年李下何由更整冠賢相賦詩同笑
傲聖君優詔許盤桓龐眉老叟俱稱壽凌雪喬松豈
畏寒屈指五人齊五福鄉人須作二疏看

前題

畢世長

非才最忝預高年分務由來近掛冠敢造鉅賢論軌
躅幸依都府得盤桓篇章奉和慙風雅眷待優隆荷
歲寒儻許衰顏叅盛列願憑繪事永傳看

前題

朱貫

各還朝政遇堯年鶴髮俱宜頂道冠乍到林泉能放
曠全拋簪紱尚盤桓君恩至重如天覆相座時親畏
地寒九老且無元老貴莫將西洛一般看

前題

馮平

詔恩分務許幽閑肯借留都獬豸冠名宦倘來空擾
攘丘園歸去好盤桓醉游春圃煙霞煖吟聽秋潭水

古今圖書集成
石寒退傅况兼爲隱伴紅塵那許復頭看

遯跡

陳搏

十年蹤跡走紅塵回首青山入夢頻
紫陌縱榮爭及睡朱門雖貴不如貧
愁聞劔戟扶危運悶見笙歌聒醉人
攜取琴書歸舊隱野花啼鳥一般春

協忠廟

梅堯臣

八月過宋都泊舟雙廟側未懷此忠良
遺烈傳碑刻五位儼朝居千年同血食
當時多苟生貴爵會誰識縱令有丘墳
都已荒荆棘古人非輕死於義實罕得

英骨化埃塵令名同羽翼飛翔出後世
景慕無終極豈若目前榮未沒身已息
西登孝王城王氣由邦國

協忠廟

王安石

兩公天下駿無地與騰驤就死獨處所
至今猶耿光中原擅兵革昔日幾侯王
此獨身如在誰令國不亡北風吹樹急
西日照窗涼志士千年淚泠泠落奠觴

睢陽篇題蔡妻張氏

徐積

嘗聞唐李氏世號爲賢妻以力營七喪
或謂難庶幾孰知蔡家婦其事乃同之
豈獨在中饋無非而無儀

古今圖書集成
孝於其所尊慈於其所卑既知義所在能終義所爲
我生至此極我嫁逢百罹其屬死略盡其骨俱無歸
身爲未亡人心乃眞男兒以己任其責無忘須臾時
但恐事不濟安知恤寒饑乃捐奉生具而爲奉匱資
面不御膏沐首不加冠笄金珠鬻於市文繡容何施
更無囊中裝唯有身上衣殆將截其髮幸苟完其肌
所得蓋良苦所積從細微如此十年久猶以爲支離
日時卜諸良宅兆相厥宜一舉十八喪一日得所依
手自植松楸身亦沾塗泥何暇裹兩足但知勤四肢

居者泣於室行者泣於岐鳥亦助叫號人思操薰裡
冥冥長夜魂所獲良可知鬱鬱佳城中不爲中道尸
卒辦其家事少慰而心悲志貞海可涸行堅山欲摧
孤誠貫白日幽光凌虹霓吾聞古烈女犖犖非無奇
一死盡易處一節亦易持至如張氏者使人尤歔歔
誰爲孝婦傳誰爲黃絹碑亦有淮上翁爲述睢陽詩
移書太史氏無令茲逸遺

妙峯亭

秦觀

王公厭承明出守南宮鑰結構得崇亭悠悠瞰清洛

是時謫仙人發軔自廬霍郊原春鳥鳴來此動豪酌
報投一何富玉案金刀錯新榜揭中楹千載見遠託
揭來訪陳迹物色屬搖落人煙隔鳧雁田疇帶城郭
紅蕖隕風漪砂礫捲飛蘅青青陵上姿獨汝森自若
人生如博奕得喪難前約金鎚初控頤已復東方作
大明昇中天龍鸞入階閣深懲漁奪弊法令宜刊削
斯民如解懸喜氣鬱磅礴公乎數登覽行矣翔寥廓

新亭

前人

洛水沄沄天上動道入隋渠下梁宋宋都堤上十二

亭一一飛驚若鸞鳳光華遠繼周王雅宴喜還歸魯
侯頌玉觴嚴令肅衣冠金縷哀音繞梁棟娟娟殘月
照波翻習習暖風吹鳥哢何處高帆落文鷁誰家駿
馬嘶征鞚柳枝芳草恨連天暮雨朝雲同昨夢借問
亭名製者誰留守王公才望重曾中雲夢吞八九日
解千牛節皆中魏國相公實會祖庭列三槐多伯仲
承明厭直出荊州轉守此都行大用此都去天纔尺
五交廣荆揚歸引控菟園事跡化黃埃清冷文雅堪
長慟舳艫銜尾車挂輪昨日出迎今日送送故迎新

古今圖書集成
無已時古往今來相戲弄亭前嶽崎淮海客末路逢
公詩酒共一樽明月難重持豈恤官期後芒種今年
節氣頗云早天矯梅花春欲縱行見亭中祖帳開千
乘送公歸法從

協忠廟

元王暉

鐵輦動地來獵火燼九縣睢陽東南衝江淮國所援
蔽遮使不前再造可立見二公明此機死守誓不變
雖危所保大如蝮螫解腕最難結衆心存沒匪石轉
彼蒼界全節誰爲落賊便已矣君不忘握爪掌爲穿

竟能濟厄運淮海了清奠至今忠烈氣皎皎白日貫
賀蘭觀成敗不飲浮屠箭殺亡計多寡比論誠可辨
我來拜遺像凜對如生面乞靈激懦衷剗決鋼同鍊
朔風吹樹聲尚想登陴戰暮倚暈月城悲歌淚如霰

梁園春

元好問

雙鳳簫聲隔綵霞宮鶯催賞玉谿花誰憐利澤門前
柳瘦倚東風望翠華

其二

暖入金溝細浪添津橋楊柳綠纖纖賣花聲動天街

古今圖書集成
遠幾處春風揭繡簾

宋宮

明于謙

龍樓高處彩雲飛
艮嶽纔成事已非
寂寞長門金鎖合
中州無復二龍歸

睢陽歎

李東陽

將軍有齒嚼欲碎
將軍有背血成淚
生為將星死為厲
盡是山川不平氣
二人同氣金不利
天與一城為國蔽
強兵坐擁暝日視
孝子忠臣竟誰是
千載功名亦天意
君不見河南節度三日至

梁園雪歌

李夢陽

昔對燕山雪岩嶢
白玉京曉曳王恭
氅飄飄入紫清
今為梁國客獨對
梁園雪黃雲索寞
連滄溟九嶷望盡
飛鴻色

飄風動三極霏雪
灑煙海天
地倏低昂
虛無變光彩
梁臺空嶠帆
枚馬今安在
飛光超忽若游龍
我欲從之問千載

梁園歌

前人

朝發金臺門夕渡博浪關
黃河如絲天上來千里不

見淮南山淮南桂樹弄婆娑掛席欲進逐洪波我今
欲作梁園歌梁園昔有信陵君名與岱華爭嵯峩三
千朱履不動色屠門執轡來相過功成不顯淚滂沱
青蠅白璧亦何多我爲梁園客不登梁王臺錦帆揚
州門一去何時迴荒煙白草古城沒登臺望之令心
哀令心哀歌且謠迷塗富貴若不足寧思白骨生蓬
蒿人生三十無少年積金累玉空前煎熬獨立天地間
長嘯視今古城隅落落一堆土千秋誰繼白與甫攬
淚浮雲灑烟莽灑烟莽風吹卷波濤沈吟投箸不暇

食蹴天濁浪何滔滔君不見昔人然諾不相許黃金
斗印如秋毫

黃河

黃元之

河渾渾發崑崙度沙磧經中原噴薄砥柱排龍門環
嵩絕華熊虎奔君不聞漢家博望初尋源揚旌遠涉
西塞垣窮探討事奇絕云是天津銀潢之所接葱嶺
三時積雪消流沙萬派從東決東州沃壤徐豫之墟
懷山襄陵赤子爲魚夕沒鉅野朝涵孟諸芒芒下邑
皆流汚民不粒食鄉無廬桑畦忽變葭葦澤麥隴盡

古今圖書集成
化龍鼉居宮中舍人方旰食羣公夙夜憂曠職星郎
又乘博望槎西去盟津求禹迹始聞故道行千艘一
朝轉徙纔容舸奔衝倏忽駭神怪淺不浮漚深沒蒿
我上梁山望曹濮長嘆滄桑變陵谷萬人舉鍤功莫
施猶擬宣防再興築宣防漢威武何若堯無爲洪波
閱九載端拱垂裳衣元圭錫夏后安得辭胼胝龍門
一疏鑿亙古功巍巍巍巍功可成河水渾復清

協忠廟

曹璉

孤城橫枕大河側浸郭茫茫波影白屹然重鎮梁衛

間屏障江淮控南北繫昔唐綱解紐時百萬雄戎起
倉猝諸郡請降王城摧遍地干戈橫流血桓桓張許
文且武臨危受命秉鐵鉞以弱敵強露肝膽出奇取
勝畫謀策矢心直欲固睢陽睢陽可保賊可克牽制
首尾春迄冬奈何困空糧道絕羅雀掘鼠鎧弩烹烹
士殺奴割愛妾日望援兵竟不來堅壁長歌徒激烈
妖氛益圍赤幟連陣雲蔽天白晝黑須臾城陷勢莫
支三十六人同死節誓爲厲鬼報何速未旬大渠果
殲滅萬代虹光照汗青君臣大義由昭晰聖世旌崇

嚴廟享生氣英英寓歸德夷齊已矣三仁遠千載雖
曠應同轍我來弔古發悲歌拔劍起舞風騷屑寄言
將來危難臣視茲精忠當是則

梁苑歌三首

王廷相

君不見梁王已破六國壘苑中便起文園臺黃金白
玉架樓閣綺榻延賓四向開清泠池上三尺雪相如
新賦傾鄒枚臨邛美人鬪花朶挑以琴心禮豈那漢
庭賣賦得千金白首遊梁計宜左今人空作古人風
抱策爲儒歎不逢古來文士不檢豈足病且覽詞彩

如長虹

梁苑東連孟諸野舊國山高水彌下黃金觸斗不作
樂徒使千年笑達者君不見漢天子愛弟侈賜空太
盈梁王受之不一驚合沓金根車宛轉玻璃駟突然
馳道流日星千乘萬騎敵鹵簿貴焰豪華傾九瀛百
年之後君爲誰有酒莫惜千金揮不信試看梁王苑
雉兔飛馳鬼火吹

黃河東來沙填海陳留十山幾山在梁王古苑九地
深歲歲龍蛇窟穴改我田在苑苑在東灌園鑿井當

古今圖書集成
其中應門兩黃鶴抱琴雙玉童行歌曳杖如遊龍前
身恐是河上公君不見七十二帝如旋蓬惟有堯舜
流高風人生百年電閃閃何必希時釣譽攀援日月
獨爲功子雲草元恆不調虞卿著書仍固窮我懷欲
附沙洲鴻

梁園白雪歌

前人

浚郊臘月三尺雪壓折梁王百尺臺梁王勝跡今何
在野人指點蓬池灰憶昔金輿下東苑翠葆雲旛曳
流霰兔園鳧沼生光輝白晝瑤瑤動樓觀才人雲從

飄渺仙當軒授簡揮雲烟陽春不說郢人調白雪爭
傳司馬篇我家住近梁王洲今年雪大膠河流蛟龍
凍縮若蜒蜒我亦冰透紫綺裘玉山銀河興不淺十
度欲賦九復休手龜形管搦不得呼兒且酌黃金甌

夫子巖

秦時雍

幽巖遺聖蹟大道瀰清寰愛景無他物尋真須北山
披荆徐可入躡步驟難攀莫訝登臨晚雲深谷口閑
辰過歸德城西二十里溪蓮盛開喜而有賦

王世貞

古今圖書集成
宋州西陂劇可憐
陂中十萬粧相鮮
紅袖欲翻爭自媚
素珠時迸不成圓
微風墮月方沾恨
初日含霞忽倍妍
却似長門零落後
乍承湯沐扈甘泉

梁園

朱家相

弟子仙蹤遠園遺
修竹名綺羅悲異代
賓從想東京龍岫孤
雲斷雁池芳草生秋
原望不極落日重合
情

微子祠

李嵩

殷闕久禾黍上公宮
在茲土茅周代典香火
宋人思蹟想存宗地
情憐去國時蕭蕭古
祠柏風雨鎖殘枝

秋日登闕伯臺

侯恪

闕伯臺高遠瞰城霞
天萬樹倚孤清我來
正值鴻初到風至不
堪葉乍橫菟苑煙深
村巷寂武陵花盡野
溪晴登臨剩有筇枝
健五嶽何須愧向平

重過開元寺有感

前人

七年不到開元寺古
屋荒涼可歎人黃鳥
自飛門外柳青松猶
在水之濱僧雛未識
前朝事客子空悲岐
路身策馬歸來將日
暮風煙回首一沾巾

九日重登闕伯臺

前人

古今圖書集成
喜無風雨到重陽別恨秋殘不盡觴昔歲故人多落魄
一時征雁各分行高臺日暮團林碧野圃霜寒送
菊香最是茱萸看不得支離未許病相妨

孝烈將軍祠

吳伯裔

何人巾幗辱青史孝烈將軍祀木蘭花鈿翠雲拋寶
鏡寒光鐵甲照征鞍關山百戰還家夢伙伴十年行
路難東閣歸來理舊鬢衆中誰辨雌雄看

商均古墓

范良彥

商均遺迹枕城荒封邑千秋事渺茫遶墓東風吹稼

穡平蕪落日下牛羊苔生新碧埋幽徑鳥倦春啼抱
野棠自是土人供伏臘九原那復更心傷

過柘城

吳國倫

入市疑村落疎陽隱暮笳河吞株野盡城逐柘溝斜
暝日疎煙火春風煖物華微官已素食問俗轉堪嗟

題公署竹

鄭三俊

蕭蕭數竿竹偏宜作風雨何處起咸韶試看此君舞

贈馬寅旭明府六行

選三

杜齊芳

宓琴行

古今圖書集成
單父琴聲清夜發移宮換羽多疏越愛人應似武城
絃嫋嫋餘音猶未歇上古無爲亦漠然何須出入勞
星月一曲南薰繼有虞寒颼縷縷侵人骨

竹馬行

淒淒草色長堤下童子紛紛騎竹馬烏雀夾車時雨
來青林漠漠春雲瀉翠樹濃花滿路開仙姿雙鳥多
瀟灑於今蒼赤避鳴騶稍近旌旄衙胥打官民覲面
不相親莫怪科條若土苴今君帶綬映春輝不減河
陽饒艷冶竹馬周迴列道傍雲霓在望我心寫

汾水行

冷泉關下汾河水嚙石轟雷波浪起雪涌霜飛不暫
閑狂瀾直射驚人耳羣山夾岸少平田河潤何如滋
九里汾水西邊有樹林暮靄朝霞紛錦綺製錦如君
豈後人裁剪經心更旖旎君去梁園動別愁君來汾
水汾人喜悲喜不同意自同星旗拂日無停軌願將
汾水化爲霖禾黍離離原隰美梁園汾水復何殊一
視天涯皆赤子

鳴鳳樓

章煥

古今圖書集成
朱薨碧瓦瑞烟浮鳳翼分明展鳳樓解道鳳鳴諧律
呂和聲今已動中州

凌霄臺

前人

環城佳氣鬱岩嶢引領層臺去路遙彩羽雙翔威鳳
起直看平地是青霄

欽定古今圖書集成方輿彙編職方典

第四百卷目錄

歸德府部紀事

歸德府部雜錄

歸德府部外編

職方典第四百卷

歸德府部紀事

府志商太戊時有祥桑穀共生於朝七日大拱

周莊王十四年秋宋大水

襄王八年春正月戊申朔隕石於宋五是月六鷁退
飛過宋都

魯隱公十年辛未取郕辛巳取防夏五月羽父先會
齊侯鄭伯於老桃

桓公二年三月公會齊侯陳侯鄭伯於稷

十二年冬公會宋公於虛於龜

十有五年冬十有二月公會宋公衛侯陳侯於袤伐

鄭

莊公十有六年冬十有二月會齊侯宋公陳侯鄭伯

許男滑伯滕子同盟於幽

僖公二十一年秋宋公楚子陳侯蔡侯鄭伯許男曹

伯會於孟

僖公二十有三年春齊侯伐宋圍緡

襄王十六年秋王出適鄭處於汜鄭子臧出奔宋子

臧好聚鵠冠鄭伯惡之使盜殺之八月盜殺之於陳
宋之間

文公十有四年六月公會宋公陳侯衛侯鄭伯許男

曹伯晉趙盾癸酉同盟於新城

頃王六年秋七月有星孛入於北斗

匡王六年春二月壬子宋華元帥師及鄭公子歸生

帥師戰於大棘宋師敗績獲宋華元

靈王八年春宋災

二十七年春無冰梓慎曰宋其饑乎宋果饑

古今圖書集成
景王二年有叫於宋太廟曰譖譖出出鳥鳴於亳社
甲午宋大災

二十年冬有星孛於大辰梓慎曰宋大辰之墟宋必
災明年五月宋災

敬王十四年熒惑守心宋景公憂之子韋曰可移於
相曰相吾之股肱可移於民曰君者待民可移於歲
曰歲饑民困吾誰爲君子韋曰君有君人之言三熒
惑宜有動果徙三舍

定公十五年鄭罕達敗宋師於老丘

莊子宋有富人天雨牆壞其子曰不築且有盜其鄰
人之父亦云暮而果大匹其財其家甚智其子而疑
鄰人之父此二人說者皆當矣厚者爲智薄者見疑
是則非智之難也而其處智尤難也

士尹池爲荆使於宋司城子罕止而觴見南家之牆
擁於前而不直西家之潦經其宮而不止問其故曰
南家工人也業鞞使徙之恐人不知其處不獲食其
業西家高而利吾宮之卑故不禁也士尹池歸適欲
興兵攻宋因諫曰宋不可攻也其主賢而相仁賢者

得人仁者能用人攻之無益楚遂釋宋

公輸般爲楚設機將以攻宋墨子聞之百舍重繭往見公輸般謂般曰吾自宋聞子吾欲藉子殺王公輸般曰吾義固不殺王墨子曰聞公爲雲梯將以攻宋宋何罪之有義不殺王而攻國是不殺少而殺衆敢問攻宋何義也公輸般服爲請見之王墨子見楚王曰今有人於此舍其文軒鄰有敝輿而欲竊之舍其錦繡鄰有短褐而欲竊之舍其梁肉鄰有糟糠而欲竊之此爲何若人也王曰必有爲竊疾矣墨子曰荆

之地方五千里宋方五百里此猶文軒之與敝輿也荆有雲夢犀兕麋鹿盈之江漢魚鼈黿鼉爲天下饒宋所謂無雉兔鮒魚者也此猶梁肉之與糟糠也荆有長松文梓榿楠豫章宋無長木此猶錦繡之與短褐也臣以王吏之攻宋爲與此同類也王曰善哉請無攻宋

梁王伐邯鄲而徵師於宋宋君使使者請於趙王曰夫梁兵勁而權重今徵師於敝邑敝邑不從則恐危社稷若扶梁伐趙以害趙國則寡人不忍也願王有

古今圖書集成
以命敝邑趙王曰然夫宋之不如梁也寡人知之矣
弱趙以強梁宋必不利也則吾何以告子而可乎使
者曰臣請授邊城徐其攻而留其日以待下吏之有
城而已趙王曰善宋人因遂舉兵入趙境而圍一城
焉梁王甚說曰宋人助我攻矣趙王亦曰宋人止於
此矣故兵退難解德施於梁而無怨於趙故名有所
加而實有所歸

齊攻宋宋使臧子索救於荆荆王大悅許救甚勸臧
子憂而反其御曰索救而得有憂色何也臧子曰宋
小而齊大夫救於小宋而惡於大齊此吾之所憂也
而荆王悅甚必以堅我我堅而齊敝荆之利也臧子
乃歸齊王果拔宋五城而荆王不至

宋康王之時有雀生鷦於城之陬使史占之曰小而
生巨必霸天下康王大喜於是滅滕伐薛取淮北之
地乃愈自信欲霸之速成故射天笞地斬社稷而焚
滅之曰威服天下鬼神罵國老諫臣爲無顏之冠以
示勇又剖婦人背鏃朝涉之脛而國人大駭齊聞而
伐之民散城不守王乃逃倪侯之館遂得病而死見

祥而不爲祥反爲禍

宋人有好行仁義者三世不懈家黑牛生白犢以問孔子曰此吉祥也居一年父無故而盲其牛復生白犢又問孔子曰吉祥也居一年其子無故而盲其後楚攻宋圍其城丁壯者皆乘城而戰死者大半此人以父子有疾皆免及圍解而疾俱復

宋元王二年江使神龜使於河至泉陽漁者豫且舉網得之龜來見夢於宋元王王召博士衛平占之介蟲先見王使人求之得龜行正晝無見風雨晦冥雲

蓋其上身如流水潤澤有光望見元王延頸而前三步縮頸而卻王怪之衛平對曰延頸而前以當謝也縮頸而卻欲急去也王曰神至如此乎不可久留遂送龜去

秦二世元年九月漢樊噲破李由從擊秦軍出亳南河間軍於杠里破之擊破王武程處軍於外黃陳勝攻大澤鄉收而攻蕺下之乃令符離人葛嬰將兵徇大澤以東攻鉅鄆苦柘譙皆下之

高帝五年漢兵追項籍至固陵齊王信魏相國越及

劉賈誘楚周殷迎黥布皆會十月圍籍於苦之垓下
六年灌嬰受詔別擊楚軍起陽武至襄邑擊破柘公
王武軍燕南又擊王武別將桓嬰白馬下破之降留
薛沛鄒蕭相攻苦譙各楚漢相拒固陵項羽伏兵於
柘藏里里演馬於楚臺駐軍於霸岡

七年靳歙從漢略梁地擊邢說軍於菑南破之又擊
楚絕其餉道起滎陽至襄邑

史記梁孝王傳梁地北界泰山山西至高陽四十餘城
皆多大縣孝王竇太后少子也愛之賞賜不可勝道

於是孝王築東苑方三百餘里廣睢陽城七十里大
治宮室爲複道自宮連屬於平臺三十餘里

梁孝王築睢陽城方三十里鼓倡節杵而後下和之
者稱睢陽曲今踵以爲故今之樂家睢陽曲是其遺
音

梁孝王築平臺臺至今存有蒹葭洲鳧藻洲梳洗潭
中有望泰山商人望鄉之處

景帝三年六月壬戌蓬星見在房南大如二斗氣色
白癸亥在心東北長丈餘

古今圖書集成
宣帝本始四年四月壬寅地震

元帝建昭元年正月戊辰隕石梁國六

後漢世祖光武帝建武元年蓋延督馬武等伐劉永
攻拔襄邑

光武建武二十四年六月丙申睢水逆流一日一夜
止

安帝永初五年夏蝗

順帝永建四年秋淫雨傷稼

桓帝元嘉元年梁國饑民相食

獻帝興平元年夏大蝗

獻帝建安元年曹操勦黃巾賊何儀等領兵至鹿邑
十四年曹操引水軍自渦入淮

魏高貴鄉公正元二年春正月魏將軍監豫州事母
丘儉及文欽起兵司馬師移諸郡兵討之師出譙宋
之間絕其歸路

晉武帝咸寧元年白雀白雉見睢陽

二年白龍一見於梁國

太康五年秋七月暴雨害豆

安帝義熙十二年月犯歲星留在房心之間占曰得歲者王後為劉裕封宋公之兆

懷帝永嘉五年夏四月漢石勒追敗太傅越軍于苦之甯平城執王衍等殺之

穆帝永和八年燕慕容垂追桓溫及於襄邑大破之北魏高祖太和八年睢陽縣獲嘉禾

十四年四月甘露見睢陽桃樹

東魏孝靜帝大通六年武平鎮獻白兔

隋文帝開皇二十九年老子祠枯樹復榮

唐高祖武德四年真源縣老子祠枯樹復生枝葉

高宗末徽四年宋州有異獸見民蔡道基舍旁高丈

餘頭類羊一角鹿形馬蹄牛尾五色有翅

中宗景龍元年宋州大風拔木壞民廬舍

十四年有異鳥見宋州郊外色青類鳩鵲所至處羣

鳥翼衛朝夕啖稻粱以哺之睢陽人適野聚觀累日

元宗開元八年齊澣牧汴奏開十八里河達於清水

得五色蟄龍暨龜鯉

二十九年真源縣老子祠九井洞復湧枯樹復榮

古今圖書集成
天寶十五年張巡與賊將楊宗明戰於寧陵北殺賊
萬餘積骨流血

肅宗至德二年丁酉冬河南節度使張鎬領兵與賊
將尹子奇戰於柘敗之

武宗會昌二年正月癸亥宋州地震

懿宗咸通二年秋七月寧陵大旱至明年六月

十四年七月宋州襄邑有獵者得雉五足三足出背
上

僖宗乾符四年秋七月王仙芝黃巢圍宋州將軍張

自勉將忠武兵七千救之殺賊二千餘人賊解圍遁
去

僖宗中和三年朱全忠救趙犇與賊戰於鹿邑敗之
後梁太祖開平四年宋州大水節度使朱友諒獻瑞
麥一莖三穗太祖曰豐年爲上瑞今宋州大水安用
此爲

後唐明宗天成二年宣武軍節度使朱守殷辟孫晟
爲判官殷反誅晟棄妻子亡命宋陳之間
宋張永德寓睢陽時有書生鄰居臥疾永德療之獲

愈一日就末德求金五兩既得即置鼎中煮之成中
金自是日與末德遊一日告適淮上末德送行數求
藥法生曰君當大貴吾不吝此慮損君福及後末德
為將屯下蔡自出騎射淮民環觀有一僧睥睨末德
名之乃睢陽書生也夜宿帳中復求前術僧曰始語
君貴今不謬矣終能謹節當保五十年富貴安用此
為
後漢高祖乾祐二年五月宋州蝗一夕抱草盡死有
司奏於朝遣官祭之

宋太祖建隆二年二月鹿邑蝗
乾德二年寧陵縣大風雨雹傷民田百五十本
開寶四年汴水決宋州穀熟縣睢陽鎮
九年宋州大風壞甲仗庫城樓軍營民舍四千五百
九十六區

太宗太平興國四年河決宋州縣華山道士丁少微
獻彤芝黝芝各一筍

淳化二年六月汴水決于宋州宋城縣
五年秋寧陵縣雨水害稼

古今圖書集成
真宗咸平元年朱進妻產二男

四年十二月鹿邑縣太清宮鐘自鳴

大中祥符元年李梅妻產二男二女

四年十一月鹿邑縣民王順慈及司徒捷家生芝各

一本

六年三月鹿邑縣太清宮甘露降五月二龍見奉迎
聖祖於穀熟舟中幢節上得之八月鹿邑縣太清宮
道士獲芝八十一本以獻又獲芝二百五十本有一
本三莖一莖如雲氣佛像者俱以獻九月宋城產芝

得五十本以獻

七年春正月車駕幸太清宮奉祀經度制置使丁謂
獻白鹿芝草

神宗元豐六年六月衛真縣洞霄宮枯槐復生枝葉
徽宗政和五年野蠶成繭

欽宗靖康元年金人陷拱州

宋史韓公裔傳公裔充康王府內知客元祐后詔王
入承大統府僚謂金兵尚近宜屯彭城公裔言國家
肇基睢陽正亦宜於睢陽受命時前軍已發將趨彭

古今圖書集成
城會天大雷電不能前王異之夜半抗聲語公裔曰
明日如睢陽決矣既卽帝位公裔累遷武功大夫貴
州防禦使

高宗紹興三十年冬十二月戊申夜白氣出尾歷心
房氏亢入天市

孝宗嘉定十五年秋八月彗出右攝提長三丈

金世宗大定二年秋七月黃河決衛州瀾漫商寧睢
柘間

二十年河決衛州瀾漫歸德等處

哀宗天興元年乙未元兵至汴金徐州行省完顏承
立因引兵入援義勝軍救侯進杜正張興率所部北
降承立入睢州二月壬子朔承立謀走歸德至陽驛
店遇元兵徐帥完顏兀里力戰而死承立等馬蹶亦
被擒使招京城不從時睢州刺史張文壽棄城從承
立皆死之戊午元兵入睢州以無主將故殘破之甚
金史石盞女魯歡傳正大九年二月以行樞密院事
守歸德乙丑大元將忒木鐸率真定信安大名東平
益都諸軍來攻是日無雲而雷有以神武祕略占之

古今圖書集成
者曰其城無害人心稍安適慶山奴潰軍亦至城中
得之頗有鬪志己巳提控張定夜出斫營發數砲而
還定平日好談兵女魯歡令自募一軍使爲提控小
試而勝上下遂恃以爲可用初患砲少欲以泥或磚
爲之議者恐爲敵所輕不復用父老有言北門之西
一菜園中時得古砲云是唐張巡所埋掘之得五千
有奇上有刻字或大吉字者大兵晝夜攻城駐營於
南城外其地勢稍高相傳是安祿山將尹子奇於此
攻巡遠得睢陽時經歷冀禹錫及官屬王璧李琦傳

瑜極力守禦城得不拔方大兵圍城議決鳳池大橋
水以護城都水官言去歲河決敖游堦時曾以水平
量之其地與城中龍興塔平果決此口則無城矣及
大兵至不得已遣招撫陳貴往決之纔出門爲游騎
所鈔無一返者三月壬午朔攻城不能下大軍中有
獻決河之策者主將從之河旣決水從西北而下至
城西南入故濰水道城反以水爲固求獻策者欲殺
之而不知所在

元太宗庚寅年拖雷擊金軍於三峰大敗之餘衆走

古本圖書集成
睢州伏兵起又敗之金合達走鈞州蒲阿走汴
世祖至元二年歸德府淫雨浹十旬

成宗元貞元年八月河決寧陵

大德元年三月河水大溢漂沒田廬

大德三年五月河決蒲口兒等處侵歸德府流害境
內百姓被災

仁宗延祐元年河決汴梁路睢州以東衝開河口數
十里居民被災

順帝至元三年二月陳州棒胡名閏兒反於信陽以

燒香惑衆妄造妖言作亂攻陷邑城

順帝至元四年夏鹿邑縣淫雨傷稼蠶麥禾皆不登
五年七月鹿邑縣蝗

至元十五年妖人劉福通自碭山夾河迎立韓林兒
僭稱帝又號小明王都亳州國號宋改元龍鳳毀遷
太清宮材木建宮闕

十六年小明王兵燬柘城縣民廬河南省平章答失
八都魯大敗劉福通於柘城守臣遁走

至正四年夏五月歸德淫雨浹二旬黃河瀑溢商寧

古今圖書集成
虞夏鹿雎考柘皆罹水患

明太祖洪武三十一年夏四月己亥歸德州大火延燒軍民一百三十餘家儒學堂齋廚號皆焚

成祖末樂元年秋虞城縣地產嘉禾秀聯雙穗

十二年六月二日虞城縣民家失火延燎十餘家時風烈火熾弗克力救知縣楊廣仁拜禱於天卽時風止驟雨大降火遂息

英宗正統五年春夏旱無麥遣官賑濟

憲宗成化二年虞城縣大饑

四年睢州民楊某妻從脅下生出一女柘城縣積水進城民多避於老君塾

十年黃河溢壞鹿邑縣城東北角

十一年黃河決王招口

十二年睢州城隍廟火災正殿及廊舍焚毀無餘

十四年夏初虞城縣蝌蚪遍水陸多聚至數石碁則上樹沿牆人咸不知所以未幾霖雨澇溢平途可以運舟如是者數歲始知爲水兆也

十五年九月八日地震

古今圖書集成
十七年秋虞城夏邑等縣大雨水害稼

十八年秋虞城縣蝗飛蔽天自東入境知縣柳澤齋
沐禱神蝗遂越境去

二十一年春夏虞城縣大旱知縣柳澤虔禱於風雲
雷雨壇越三日有二龍見於東南遂大雨合境霑足
後麥有五岐之瑞

二十三年柘城縣旱蝗癘疫大作

孝宗弘治六年大雪塞戶民鑿穴而出三月不霽民
多凍餒死者

十二年考城縣產瑞麥至有一莖七穗者

十五年夏六月河決入城公私廨舍蕩然無餘

十六年夏秋不雨

武宗正德三年春旱秋潦

武宗正德六年春流賊劉六劉七等猖獗犯考城縣
境斬關而入大肆殘酷又至鹿邑縣竹愷店鄉勇武
學劉海謝福宋統追賊首馬五斬之秋河南中丞委
睢陽衛指揮譚旻領官軍守禦於柘城冬十月僉事
孫盤領兵至鹿邑縣禦賊兵十一月流賊陷沈丘及

古今圖書集成
鹿邑境執都司潘翀殺都司王保射傷布政司經歷任傑

七年秋黑眚見人皆不寢鳴鑼持兵以備之數月乃息

八年夏大雨沒麥秋蝗蝻食穀

九年夏黑眚夜出自東南來多魘魅人轉相驚旬日乃息

十一年鹿邑縣大旱自正月至六月不雨麥禾不登世宗嘉靖元年十二月十五日紅風四塞自辰至午

乃止

嘉靖元年冬萊蕪賊王堂率萬人入郡境大肆搜掠睢州柘城鹿邑考城等處皆被害官軍禦之遇於遠襄城敗績殺傷官軍七千餘男婦無數賊勢大振二年正月初三日地震秋霖雨百日平地行舟冬大饑人相食

三年元日地震春二月晝晦自未至酉人畜不寧夏四月大雨雹大如雞卵人畜皆爲所殺是年柘城縣大疫民死無筭

四年夏大雷雨鹿邑縣民郭銀震死

五年夏五月夜地震有聲民屋搖動遠邇愕然

六年夏六月夏邑縣蝗蝻生

七年夏六月柘城縣旱民饑

八年秋七月八月商丘鹿邑柘城等處俱蝗飛蔽天

人馬不能馳九月河決夏邑縣張家口

九年夏五月浚白河決

十年鹿邑縣小兒病痘疹死者甚衆

十一年白河決民田多淹沒

十二年八月黃河水溢至鹿邑縣城壕

十三年三月鹿邑縣民家牛產異物或曰麟也五月

鹿邑縣民獻瑞麥五岐

十六年夏六月河決瀰漫濫於城下至後十九年冬

始涸

十八年春大饑疫死者相望

十九年秋七月白河決故道沙淤徙於黃河

二十年春三月晝晦星見飛沙拔木咫尺不能辨夏

有麥有一莖三穗者

二十一年夏五月夏邑縣蝗蝻食麥六月朔日食晝晦星見雨風交作晝夜如注四十餘日河決野雞岡入柘城縣境二十餘里民被衝者萬家溺死無計浸城丈餘凡官私房舍俱倒沒秋七月夏邑縣蝗蝻食穀

二十三年鹿邑縣民袁有德死七日殯而復甦
二十五年春正月壬申大火二日乃息焚民舍三百餘家夏六月黃河決淹沒民田秋八月地連震者三
二十六年夏五月夏邑縣大雨河決漂蕩民田廬

二十九年夏五月柘城縣大火

三十一年柘城縣九月梨花放

三十三年柘城縣大歉賊師尚詔攻太康弗下移攻鄆陵官軍敗績又自鄆陵移攻扶溝都巡楊乃令御史翟冀左使鄒守愚等會兵討之與賊戰於襄城賊大敗賊副王用就擒尚詔引餘賊遁去官軍乘勝追至五河斬首千五百級焚賊舟二十六艘中土平尚詔莫知所終

三十六年夏四月大雨雹巨如雞卵樹木禽畜損傷

甚多

三十八年秋七月河決傷禾睢州駱駝嶺水中出石如太湖石之狀人爭取之數日方盡

三十九年河北徙

四十一年夏五月柘城縣旱忽雨雹大如盤小如碗壞屋禾稼歲大饑

神宗萬曆元年春二月大風黃塵蔽天黑暗終日

五年冬雪深數尺

六年四月儀封人曹嶮作亂自稱三乘教主官兵逐

之崙走鹿邑生擒之

八年春柘城縣饑

九年春夏鹿邑柘城皆大水傷禾稼冬無冰

十年柘城縣旱夏邑縣蝗夜過聲如風雨嚙衣毀器所至草樹爲盡

十一年三月隕霜殺麥

十二年柘城縣又旱

十五年合郡大饑柘城縣尤甚民食草根樹皮

十六年春鹿邑縣饑

十八年鹿邑縣穀一莖七穗

十九年鹿邑縣麥秀雙岐

二十一年春三月三日黑風大作自日至夜人迷相失

二十二年春鹿邑縣大饑民多流亾五月連雨至九月麥秋不登

二十三年鹿邑縣麥秋不登

二十九年河決支流自出平地皆水

三十二年河溢大疫河上夫死者相枕

三十三年夏邑縣大有年

三十四年睢州人家豕生象

三十八年春三月三日夕睢州雷震都御史李汝華家樓上忽有黑赤二龍一龍以爪剔樓牆自下至頂皆去一磚如斧鑿然移時乃去

四十年夏邑縣蝗蝻生

熹宗天啓二年春二月地震有聲自西北來聲如雷金鐵皆響犬驚吠

五年霪雨自夏至秋平地行舟

七年夏邑縣蝗大旱

愍帝崇禎二年冬十月大雷是年睢州賊朱炳南招集
集匪命謀襲汴梁事洩被擒梟首

三年夏邑縣大雹傷稼

四年五月十一日夜鹿邑縣怪風起西北大雷電拔
木居民有見鬼神形及異物者

五年霖雨自夏至秋平地行舟

七年沙雞至毛色如鶉

八年春正月流賊入柘城縣焚戮十七日流賊高應

祥數萬至鹿邑縣城下焚掠二月初六日流賊攻睢
州城鳴鳳門幾陷

九年春正月總督三省兵部尚書盧象升勦賊領兵
至鹿邑縣

十年夏五月井有怪在北門井內人入者輒死

十年九月流賊寇睢州城分爲二一向城南一向城
北十一月流賊入柘城縣境焚戮又以數百萬衆至
鹿邑縣城下連營五十餘里殺村民十數萬

十一年四月流賊寇睢州渾子集野雞岡一帶殺戮

甚慘

十二年二月流賊格裏眼至鹿邑縣城下擄掠三月流賊一斗穀襲破柘城縣西關焚戮後卽遁去

十二年夏蝗冬燠

十三年大饑人相食

十三年汴南土賊袁老山集饑民入柘城縣焚戮九月土賊一條龍反寇睢州旬日之間衆至十餘萬

十四年大疫死者相望

十四年春河北流賊袁時中渡河寇睢州柘城等處

十五年春二月袁時中攻鹿邑縣城八日不克又攻柘城縣城破外城自己酉至壬戌圍始解三月二十二日流賊李自成羅汝才袁時中合營寇睢州睢州城破三日又攻歸德府城亦破四月流賊過郡境連營數百里擄掠一空自此遂攻汴梁不克復移兵歸德過寧陵睢州等處城垣拆毀九月賊決河灌汴黃河泛溢郡境鹿邑等縣俱平地水深丈餘人民死囚殆盡是年安平集土賊劉其清等亦入柘城縣焚戮月餘官私廬舍俱成丘墟

古今圖書集成
十六年許定國圍寧陵縣城前後計三月攻打十餘日不下又柘城縣土賊韓世俊等聚衆攻圍本縣城數日焚掠無筭

十七年許州賊郭鳳岐勾引叛黨潛入考城縣城中盤據七十餘日殺士民無數

歸德府部雜錄

史記貨殖傳夫自鴻溝以東芒碭以北屬巨野此梁宋也陶睢陽亦一都會也昔堯作游成陽舜漁於雷澤湯止於亳其俗猶有先王遺風重厚多君子好稼穡雖無山川之饒能惡衣食致其畜藏

水經注淮水又東逕夏丘縣南注又東渙水西入九里江注之渙水又東南流逕雒丘縣故城南又東逕承匡城又東逕襄邑縣故城南故宋之承匡襄牛之地宋襄公之所葬故號襄陵矣竹書紀年梁惠成王

古今圖書集成
十七年宋景公衛公孫倉會齊師圍我襄陵十八年
惠成王以韓師諸侯師于襄陵縣齊侯使楚景舍來
求成公會齊宋之圍卽于此也西有承匡城春秋會
于承匡者也秦始皇以承匡卑濕徙縣于襄陵更爲
襄邑也王莽以爲襄平也漢桓帝建和元年封梁冀
子胡狗爲侯國陳畱風俗傳曰縣南有渙水故傳曰
睢渙之間出文章天子郊廟御服出焉尚書所謂厥
篚織文者也夫自新蔡以東芒砀以北風可謂此矣
歸德府志畱趙村隋煬帝開河記睢陽有王氣占天

耿純臣奏五百年當有天子興煬帝時已昏淫不以
爲信及遣麻叔謀開汴河自睢陽西穿渠南北回屈
東行過畱趙村連延而去其後五百年宋太祖以歸
德節度使起爲天子與畱趙村言相符然則趙宋之
興已預言之矣

歸德府部外編

開河記睢陽有王氣出占天耿純臣奏後五百年當
有天子興煬帝已昏淫不以爲信時遊木蘭庭命袁
寶兒歌柳枝詞因觀殿壁上有廣陵圖帝瞪目視之
移時不能舉步時蕭后在側謂帝曰知他是甚圖畫
何消皇帝如此掛意帝曰朕不愛此畫只爲思舊遊
之處於是帝以左手凭后肩右手指圖上山水及人
煙村落寺宇歷歷皆如目前謂后曰朕昔征陳主時
遊此豈期久於臨軒萬機在躬便不得豁於懷抱也

言訖聖容慘然后曰帝意在廣陵何如一幸帝聞心中豁然翌日與大臣言欲至廣陵旦夕遊賞當此之時以雲煙爲靈景視榮貴若陳腐議欲泛巨舟自洛入河自河達海入淮至廣陵羣臣皆言似此程途不啻萬里又孟津水緊滄海波深若泛巨舟事恐不測時有諫議大夫蕭懷靜奏曰臣聞秦始皇時金陵有王氣始皇使人鑿斷砥柱王氣遂絕今睢陽有王氣又陛下喜在東南欲泛孟津又慮危險况大梁西北有故河道乃是秦時王離決水灌大梁之處欲乞陛

下廣集兵夫於大梁起首開掘西自河陰引孟津水入東至淮放孟津水出此間地不過千里况於睢陽境內過一則路達廣陵二則鑿穿王氣帝聞奏大喜羣臣皆默帝乃出勅朝堂有諫開河者斬之詔以征北大總管麻叔謀爲開河都護以蕩寇將軍李淵爲副使淵稱疾不赴卽以左屯衛將軍令狐達代李淵爲開渠副使都督自大梁起首於樂臺之北建修渠所署命之爲卞渠因名其府署爲卞渠上源傳舍也詔發天下丁夫男年十五以上五十以下者皆至如

有隱匿者斬三族帝以河水經於下乃賜卞字加水
丁夫計三百六十萬人乃更五家出一人或老或幼
或婦人等供饋飲食又令少年驍卒五萬人各執杖
為吏如節級隊長之類共五百四十三萬餘人叔謀
乃令三分中取一分人自上源而西至河陰通連古
河道迤邐趨愁思臺而至北去又令二分丁夫自上
源驛而東去乃隋大業五年八月上旬建功畚鍤既
集東西橫布數千里纔開斷未及丈餘得古堂室可
數間瑩然肅靜漆燈晶煌照曜如晝四壁皆有彩畫

花竹龍鬼之像中有棺槨如豪家之葬其從工吏聞
於叔謀命啓棺一人容貌如生肌膚潔白如玉而肥
其髮自頭出而覆其面過腹胷下略其足倒生而上
及其背下而方止搜得一石銘上有字如蒼頡鳥跡
之篆乃召夫中有識者免其役有一下邳民讀曰我
是大金仙死來一千年數滿一千年背下有流泉得
逢麻叔謀葬我在高原髮長至泥丸更候一千年方
登兜率天叔謀乃自備棺槨葬於城西隅之地次開
掘陳畱帝遣使馳御署玉祝白璧一雙具少牢之奠

古今圖書集成
祭於畱侯廟以假道祭訖忽有大風出於殿內窻牖
間吹鑠人面使者退自陳畱果開掘東去往來負擔
拖鑿者風馳電激遠近之人如蜂屯聚既達雍丘時
有一夫乃中牟人偶患偃僂之疾不能前進墮於隊
後伶仃而行是夜月色澄靜聞呵殿聲甚嚴夫鞠躬
俟道左良久見清道繼至儀衛周旋一貴人戴侯冠
衣王者衣乘白馬命左右呼夫至前謂曰與我言爾
十二郎還白璧一雙爾當賓於天言畢取璧以授夫
跪受訖欲再拜貴人躍馬西去屆雍丘以獻於叔謀

熟視乃帝獻畱侯物也詰其夫夫具道叔謀性貪乃
匿璧又不曉其言慮夫洩於外乃斬以滅口然後於
雍丘至大林林中有小祠廟叔謀訪問村叟曰古老
相傳呼爲隱士墓其神甚靈叔謀不以爲信將瑩域
發掘數尺忽鑿一竅嵌空羣夫下視有燈火熒熒無
人敢入者乃指使將官武平郎將狄去邪者請入探
之叔謀喜曰真荆聶之輩也命繫去邪腰下約數十
丈方及地去邪解其索行約百步入一石室東北角
有四石柱鐵索二條繫一獸大如牛熟視之一巨鼠

古今圖書集成
也須臾石室之西有一石門洞開一童子出曰子非
狄去邪乎曰然也童子曰皇甫君望子已久乃引入
見一人服朱衣頂雲冠居高堂之上去邪再拜其人
不言亦不答拜綠衣吏引去邪立於廊之西階下良
久堂上人呼力士牽取阿廢來阿廢煬帝小字武夫數人形
質醜異魁偉控所見大鼠至去邪本乃廷臣知帝小
字莫究其事但屏氣而立堂上人責鼠曰吾遣爾暫
脫皮毛爲中國主何虐民害物不遵天道鼠但點頭
搖尾而已堂上人益怒令武士以大棒搥其腦一擊

而碎有聲如牆崩其鼠大叫若雷吼然方欲舉杖再
擊俄一童子捧天符而下堂上人驚躍降陛俯伏聽
命童子乃宣言曰阿廢數本一紀今已七年更候五
年當以練巾繫頸而死童子去堂上人復令繫鼠於
舊室中堂上人謂去邪曰與吾語麻叔謀謝爾伐吾
瑩域來歲奉爾二金刀勿謂輕酬也言訖綠衣吏引
去邪於他門出約行十數里入一林躡石攀藤而行
回顧已失使者又行三里餘見草舍一老父坐土塌
上去邪訪其處老父曰此乃嵩陽少室山下也老父

古今圖書集成
尚去邪所至之處去邪一一言老父遂細解去邪去邪知煬帝不永之事且曰子能免官卽脫身於虎口也去邪東行回視茆屋已失所在時麻叔謀已至寧陽縣去邪見叔謀具白其事初去邪入墓後其墓自崩將謂去邪已死今日却來叔謀不信將謂狂人去邪乃託狂疾隱終南山時煬帝以患腦疼月餘不視朝訪其因皆言帝夢中爲人搗其腦遂發痛數日乃是去邪見鼠之日也叔謀旣至寧陵縣患風逆起坐不得帝令太醫令巢元方往視之曰風入腠理病在

胃臆須用嫩羊肥者蒸熟糝藥食之則瘥叔謀取半年羊羔殺而取腔以和藥藥未盡而病以瘥自後每令殺羊羔日數枚同杏酪五味蒸之置其腔盤中自以手攪擘而食之謂曰含酥糝鄉村獻羊羔者數千人皆厚酬其直寧陵下馬村陶榔兒家中巨富兄弟皆兇悖以祖父塋域傍河道二丈餘慮其發掘乃盜他人孩兒年三四歲者殺之去頭足蒸熟獻叔謀咀嚼香美迥異於羊羔愛慕不已召詰榔兒榔兒乘醉泄其事及醒叔謀乃以金十兩與榔兒又令役夫置

一河曲以護其塋域榔兒兄弟自後每盜以獻屢獲甚厚貧民有知者競竊人家子以獻求賜襄邑寧陵睢陽界所失孩兒數百冤痛哀聲旦夕不輟虎賁郎將段達爲中門使掌四方表奏事叔謀令家奴黃金窟將金一埒贈與凡有上表及訟食子者不訊其詞理並令笞背四十押出洛陽道中死者十有七八時令狐達知之潛令人收兒骨未及數日已盈車於是城市村坊之民有孩兒者家置木櫃鐵裹其縫每夜置子於櫃中鎖之全家秉燭圍守至明開櫃見子卽

長幼皆賀旣達睢陽界有豪寨使陳伯恭言此河道若取直路徑穿透睢陽城如要回護卽取令旨叔謀怒其言回護令推出腰斬令狐達救之時睢陽坊市豪民一百八十戶皆恐掘穿其宅并塋域乃醵金三千兩將獻於叔謀未有梯媒可達忽穿至一大林中有墓故老相傳云宋司馬華元墓掘透一石室室中漆燈棺柩帳幕之類遇風皆化爲灰燼得一石銘云睢陽土地高竹木可爲塚若也不迴避奉贈二金刀叔謀曰此乃詐也不足信是日叔謀夢使者召至一

宮殿上一人衣絳綃戴進賢冠叔謀再拜王亦答拜畢曰寡人宋襄公也上帝命鎮此方二千年矣倘將軍借其方便回護此城卽一城老幼皆荷恩德也叔謀不允又曰適來護城之事蓋非寡人之意從奉上帝之命言此地後五百年間當有王者建萬世之業豈可爲逸遊致使掘穿王氣叔謀亦不允良久有人入奏云大司馬華元至矣左右引一人紫衣戴進賢冠拜覲於王前王乃言護城之事其人勃然大怒曰上帝有命匡護叔謀愚昧之夫不曉天意乃大呼左

右令置拷訊之物王曰拷訊之事何法最苦紫衣人曰鎔銅灌之口爛其腸胃此爲第一王許之乃有數武夫拽去叔謀脫去衣惟畱犢鼻縛鐵柱上欲以銅汁灌之叔謀魂膽俱喪殿上人連止之曰護城之事如何叔謀連聲言謹依上命遂令解縛與本衣冠王令引去將行紫衣人曰上帝賜叔謀金三千兩取於民間叔謀性貪謂使者曰上帝賜金此何言也使者曰有睢陽百姓獻與將軍此陰注陽受也忽如夢覺旣覺神不住體睢陽民果賂黃金三千兩因叔謀家

古今圖書集成
奴黃金窟而獻叔謀思夢中事乃收之立名陳伯恭
令自睢陽西穿渠南去回屈東行過劉趙村連延而
去令狐達知之累上表爲段達抑而不獻至彭城路
經大林中有偃王墓掘數尺不可掘乃銅鐵也四面
掘去其土惟見鐵墓旁安石門扁鎖甚嚴用鄴人楊
民計撞開墓門叔謀自入墓中行百步二童子當前
曰偃王顛望久矣乃隨而入見宮殿一人戴通天冠
衣絳綃坐殿上叔謀拜王亦拜曰寡人瑩域當河道
今奉與將軍玉寶遣君當有天下倘然護之丘山之

幸也叔謀許之王乃令使者持一玉印與叔謀叔謀
視之印文乃古帝王受命寶也叔謀大喜王又曰再
三保惜此刀刀之兆也叔謀出令兵夫曰護其墓時
煬帝在洛陽忽失國寶搜訪宮闈莫知所在隱而不
宣煬帝督功甚急叔謀乃自徐州曉夕無暇所役之
夫已少一百五十萬下塞之處死屍滿野帝在觀文
殿讀書因覽史記見秦始皇築長城之事謂宰相宇
文達曰始皇時至此已及千年料長城已應摧毀宇
文達順帝意奏曰陛下偶然讀秦皇之事建萬世之

業莫若修其城堅其壁帝大喜乃詔以舒國公賀若
弼爲修城都護以諫議大夫高頴爲副使以江淮吳
楚襄鄧陳蔡并開拓諸州丁夫一百二十萬修長城
詔下若弼諫曰臣聞秦始皇築長城於絕塞連延一
萬里男死女曠婦寡子孤其城未就父子俱亡陛下
欲聽狂夫之言學亡秦之事但恐社稷崩離有同秦
世帝大怒未及發言宇文達在側乃叱曰爾武夫狂
卒有何知而亂其大謀若弼怒以象簡擊宇文達帝
怒令囚若弼於家是夜飲酖死高頴亦不行宇文達

乃舉司農卿宇文弼爲修城都護以民部侍郎宇文
愷爲副使時叔謀開汴梁盈灌口點檢丁夫約折二
百五十萬人其部役兵士舊五萬人折二萬三千人
功旣畢上言於帝決下口注水入汴梁帝自洛陽遷
駕大渠詔江淮諸州造大船五百隻使命至急如星
火民間有配著造船一隻者家產破用皆盡猶有不
足枷項笞背然後鬻貨男女以供官用龍舟旣成泛
江沿淮而下至大梁又別加修飾砌以七寶金玉之
類於是取吳越民間女年十五六歲者五百人謂之

殿脚女至於龍舟御楫卽每船用綵纜十條每條用殿脚女十人嫩羊十口令殿脚女與嫩羊相間而行牽之時恐盛暑翰林學士虞世基獻計請用垂柳栽於汴渠兩隄上一則樹根四散鞫護河隄二乃牽舟之人護其陰三則牽舟之羊食其葉上大喜詔民間有柳一株賞一縑百姓競獻之又令親種帝自種一株羣臣次第種方及百姓時有謠言曰天子先栽然後百姓栽栽畢帝御筆寫賜垂楊柳姓楊曰楊柳也時舳艫相繼連接千里自大梁至淮口聯綿不絕錦

帆過處香聞百里既過雍丘漸達寧陵界水勢緊急龍舟阻礙牽駕之人費功轉甚時有虎賁郎將鮮于俱爲護纜使上言水淺河窄行舟甚難上以問虞世基曰請爲鐵脚木鵝長一丈二尺上流放下如木鵝住卽是淺帝依其言乃令右翼將軍劉岑驗其水淺之處自雍丘至灌口得一百二十九處帝大怒令根究本處人吏姓名應是木鵝住處兩岸地分之人皆縛之倒埋於岸下曰令教生作開河夫死爲抱沙鬼又埋却五萬人既達睢陽帝問叔謀曰坊市人煙所

古今圖書集成
掘幾何叔謀曰睢陽地靈不可干犯若掘之必有不
祥臣已回護其城帝怒令劉岑乘小舟根訪屈曲之
處比直路較二十里帝益怒乃令擒出叔謀囚於後
獄急宣令狐達詢問其由達奏自寧陵便爲不法初
食羊後啖嬰兒養賊陶榔兒盜人之子受金三千兩
於睢陽擅易河道乃取小兒骨進呈帝曰何不奏達
曰表章數上爲段達扼定而不進帝令人搜叔謀囊
橐中得睢陽民所獻金又得畱侯所還白璧及受命
寶玉印上驚異謂宇文達曰金與璧皆微物寡人之

寶何自而得乎宇文達曰必是遺賊竊取之帝瞪目
而言曰叔謀今日竊吾寶明日盜吾首矣達在側奏
曰叔謀常遣陶榔兒盜人之子恐國寶榔兒所盜也
上益怒遣榮國公來護兒內史李百藥太僕卿楊義
臣推鞠叔謀置臺署於睢陽并收陶榔兒全家令榔
兒具招入內盜寶事榔兒不勝其苦乃具事招款又
責段達所收令狐達奏章不卽奏之罪獄成進上帝
問丞相宇文達曰叔謀有大罪四條食人之子受人
之金遣賊竊寶擅易河道請用峻法誅之其子孫取

聖旨帝曰叔謀有大罪爲開河有功免其子孫只令腰斬叔謀於河側時來護兒受勅未至叔謀夢一童子自天而降謂曰宋襄公與大司馬華元遣我來感將軍護城之惠去年所許二金刀今日奉還叔謀覺曰據此先兆不祥我腰領難存矣言未畢護兒至驅於河之北岸斬爲三段榔兒兄弟五人并家奴黃金窟并鞭死中門外投達免死降官爲洛陽監門令歸德府志袁正辭柘城人常積錢盈室室中每有聲如牛鳴人以爲妖勸其散積以禳之正辭曰吾聞物

之有聲求其同類耳宜益以錢聲必止聞者傳以爲笑

Blank manuscript page with vertical lines.



